

վիճակս առաւել քան զբաւականն , զի մի թափառեսցին վասն աւուրն պարենի . 10°. Բանալ վարժարան 'ի Կոստանդինուպոլիս յանուն Ս . Էջմիածնի եւ ծախիւք նորին 'ի դաստիարակութիւն ազգային մանկանց : Զայսուսիկ 10 դըլուխս բանից եւ զայլ կարեւոր խնդիրս , զորս խոստանայր Յովհաննէս Եպիսկոպոս ծանուցանել ազգին 'ի դալստեան իւրում : Իսկ Գլխաւորք ազգին սահմանեցին 'ի ժողովն Պատրիարքարանի չյուզել այժմ՝ զայդպիսի խնդիրս , եւ չըպահանջել հրովարտակ 'ի դրանէ վասն Կաթուղիկոսին , զի չէր ժամանակ , եւ գրել առ Յովհաննէս Եպիսկոպոս դառնալ անդրէն յԷջմիածին : Ի ժողովի աստ խօսեցաւ Պօղոս վարդապետ վասն այցելութեան Երուսաղէմի , այլ չեղև ինչ համաձայնութիւն , (1814) :

Պօղոս վարդապետ Փոխանորդ Երուսաղէմի գնաց յԷջմիածին եւ ձեռնադրեցաւ Եպիսկոպոս յԵփրեմ Կաթուղիկոսէ , եւ 'ի դառնալ իւրում՝ անտի 'ի Կոստանդինուպոլիս , ետես զի տարածեալ էր ցաւ Ս . Աթոռոյն 'ի մէջ ազգին , եւ սկսաւ այնուհետեւ հետեւիլ վասն այցելութեան նորա , բայց չեղև ինչ օգուտ , զի յառաջագոյն խոյս տուեալ էր ինքն յԷջմիածին 'ի պատճառս խռովութեան Ամիրայից սակս ոչինչ իրաց . զի մի առիթ համարեացեն զինքն , թէպէտ ոմանք 'ի նոցանէ ուխտեալ էին ոչ ուտել եւ ոչ ըմպել մինչեւ սղանցեն զՊօղոս , եւ այժմ դարձեալ եգիտ զնոսա 'ի նոյն կիրս վարակեալ , զի զնա համարէին արմատ դառնութեան եւ շառաւիղ ատելութեան վերընծիւղեալ 'ի մէջ ազգին , թէպէտ անագան ուրեմն 'ի միտ առին զտարածայն կարծիս իւրեանց : Զանայր Պօղոս ածել զնոսա 'ի մի միաբանութիւն սիրոյ , եւ չլինէր հնար , որպէս ուսաւ զպատճառն 'ի նոցանէ , զի համբաւ իմն հանեալ էին զՔեահեայ Ամիրայէն եւ չարաչար բամբասէին զնա իբր անհաւատարիմ Տէրութեան եւ բարեկամ Ռուսաց , եւ զՊատրիարքն նախարար նորին , զայս արարին զի բարձցեն զնա 'ի միջոյ , կամ ընկեսցեն 'ի պատուոյ բարեկամօք եւ ծանօթիւք նորին , այլ վրիպեցան 'ի յուսոյ իւրեանց : Եւ Արբահամ Պատրիարք Մէլիքեան զհետ մտեալ էր հանել արքունուստ հրովարտակ վասն Եփրեմ Կաթուղիկոսի , բայց եւ ոչ այն յաջողեցաւ , զի ոչ ոք համարձակէր խորհիլ եւ կամ խօսիլ 'ի վերայ այնր :